


NEDIM TUNO, JUSUF TOPOLJAK, ADMIR MULAHUSIĆ

**MONOGRAFIJA "GEODETSKA NASTAVA I OBRAZOVANJE U  
SARAJEVU : 1890-1960"**



Godine 2020. se navršilo punih 130 godina od kada se u Bosni i Hercegovini započelo sa institucionalnim izučavanjem geodezije, tj. kada su učenici Tehničke srednje škole u Sarajevu, po prvi put u historiji, počeli slušati nastavu iz geodetskih predmeta. Tu važnu obljetnicu je mali tim profesora sa Odsjeka za geodeziju i geoinformatiku Građevinskog fakulteta UNSA odlučio obilježiti prikladnom publikacijom, koja bi bila zanimljiva ne samo geodetskim stručnjacima nego i svima koje zanima historija bosanskohercegovačkog školstva. Autori su se prilikom istraživanja i prikupljanja izvorne dokumentacije raspoloživog arhivskog gradiva suočili s nizom prepreka i problema. Nažalost, arhivski dokumenti Srednje tehničke škole su zbog ratnih i poslijeratnih prilika veoma slabo sačuvani te su mnoge važne informacije o geodetskoj nastavi i obrazovanju u Sarajevu nepovratno izgubljene. Uz

ogroman trud koji su autori morali uložiti da bi se prikupljeni fragmentirani materijal posložio u jednu preglednu cjelinu, nastala je prva dosad napisana sinteza geodetske nastave u Sarajevu od 1890. do 1960. godine. U njoj su hronološki cjelovito prikazana cjelokupna zbivanja, kao i istaknute osobe koje su obilježile period prvih 70 godina geodetskog obrazovanja u Bosni i Hercegovini. U tom razdoblju dominirala je srednjoškolska geodetska nastava i obrazovanje geodetskih tehničara u Tehničkoj srednjoj školi u Sarajevu, iz koje se 1949. godine izdvaja samostalna Geodetska srednja tehnička škola. Te su škole odigrale ogromnu ulogu u stvaranju korpusa odgovarajućih geodetskih kadrova u BiH. U monografiji je detaljno opisano školovanje geometara u Sarajevu tokom uprave Austrougarske monarhije u BiH, kao i za vrijeme monarhističke Jugoslavije, a posebna pažnja se poklonila teškom naslijeđu nakon II svjetskog rata, pogoršanom ratnim razaranjima i stradanjem geometara u ratnim zbivanjima, kada je bilo potrebno osigurati geodetske stručnjake za obnovu i izgradnju BiH. Za razliku od ranijeg perioda, planiranje obrazovanja geodetskih kadrova u socijalističkoj BiH realizovano je na republičkom nivou pri čemu je primijenjen sistemski pristup koji je proizlazio iz poznavanja stvarnih trenutnih i projekcijskih potreba geodetske struke. Monografija donosi podatke i o univerzitetskoj nastavi geodezije u Sarajevu, s kojom se započelo 1941. godine.

Knjiga je izašla iz štampe u junu 2023. godine, u izdanju Saveza udruženja građana geodetske struke u Bosni i Hercegovini. Formata je B5, tvrdog uveza, a broji 123 stranice. Dodijeljen joj je ISBN 978-9926-8804-0-8.

*Tomaž Ambrožič*